



Vn pauvre malade paralytique, n'ayant personne pour le ietter en la Piscine pour y recevoir guarison, est rendu sain par Iesus-Christ.

L y auoit en Ierusalem vn lauoir où les moutons alloient abbreuer, qui auoit cinq porches, esquels gisoit grande quantité de malades, Aueugles & Boiteux, & qui auoient les membres secs, attendans le mouuement de l'eau: car vn Ange en certain temps descendoit au lauoir, & troubloit l'eau, & lors le premier qui descendoit apres le troublement de l'eau estoit guarý de quelque maladie qu'il fut detenu. Or y auoit-il vn homme qui estoit detenu de maladie depuis trente huit ans; Iesus le voyant par terre, & connoissant qu'il y auoit esté long temps, luy dist; Veux-tu estre guarý? le Malade répond: Seigneur, ie n'ay personne qui me mette au lauoir, quand l'eau est trouble, & cependant que i'y viens, vn autre y descend: Iesus luy dist, Leue-toy, charge ton lit, & marche. Incontinent il fut guarý, & chargea son lit; dont les Iuifs le reprirent, de ce qu'il portoit son lit au iour du Sabbath: mais il leur répondit, Celuy qui m'a guarý, & rendu sain, m'a dit, Charge ton lit, & marche. Enfin les Iuifs ayant entendu que cette oeuvre admirable auoit esté faite par Iesus au iour du Sabbath, chercherent le moyen de le mettre à mort.